



Sang President Thomas S. Monson

Kapai Kan en Tehnpas Sarawi

Ni atail kin kohla nan tehnpas sarawi, pali ngenetail pahn kin keirda oh pepehm en popohl kodohng kitail.

Riei ohl oh lih kesempwal akan, I kapingki mehleh ahi patehng kumwail nimenseng en Easter kaselel wet ni atail medemedewe atail Soundor en sampah. I patohwen kiheng emen emen kumwail ahi limpoak oh wahu oh kapakapki Samatail Nanleng en kamarainihkin kumwail ahi kaweid kan.

Tuhpene lap wet wiahier sounpar isuh sang ni ansou me I wiahla Presiden en Mwomwohdiso. Nan sounpar isuh wia sounpar soupisek kei me audaudki ekei kahpwal oh pil kapai tohto. Sang nan pwungen kapai kaselel oh sarawi pwukat wia ansou mwahu me I ahneki en kasarawihla tehnpas sarawi kapw oh me onohn sapahl kan.

Nan Nohpembe me nekiero I ahneki ansou mwahu en kasarawihla Tehnpas Sarawi kaselel en Phoenix Arizona. President Dieter F. Uchtdorf, Elder Dallin H. Oaks, Elder Richard J. Maynes, Elder Lynn G. Robbins, oh Elder Kent F. Richards. me iangie. Ni soutik mwohn rahn en kasarawio, me pwulopwul kan tohtohsang [pahkid]

4000 kawawih ni arail wia kahlek kaselel kei. Mwurin rahno tehnpas sarawio kasarawihla nan tiepene siluh me inenen sarawi oh kamarain.

Kokoudahn tehnpas sarawi kan kaselel ni sansal me Mwomwohdiso wet kekeirda. Mwomwohdiso sapwellmanki tehnpas sarawi 144 me wie doadoahk nan sampah, iangahki meh 5 onohn sapahl oh meh 13 me kapw wiewiawi. Pil kapatahieng meh 13 me pakairdahr mwowe wie koaskoasoan-soan mwohn ah pahn tepda wiewih. Nan pahret se kaskasik pwurehng kasarawihla tehnpas sarawi riau oh pil kasarawihla me kapw meh limau.

Nan pahr riau samwalahro, ni aht nannantihong en wiadahsang tehnpas sarawi me pakairdahr kan, se pil kauhdi pilahn en tehnpas sarawih kapw teikan. Nimensenget, I pil perenki ahi pahn pakairki me tehnpas sarawi siluh pahn pil kokouda wasa siluh pwukat: Abijan, Ivory Coast; Port-au-Prince, Haiti; oh Bangkok, Thailand. Ia wen kapai laud me pahn kohleng towe loaloapwoat kan en wasa pwukat oh, mehleh, wasa koaros

me mie tehnpas sarawi kokoudahr ie nan sampah.

Wiepen doadoahk en diarada anahn oh rapahkihda wasa me tehnpas sarawi kan en kokouda ie kin wiewiawi, pwe se anahne tohwehkan koaros en kak kohla nan tehnpas sarawi oh dehr tohnmeteri kihla arail ansou oh neirail mwohni. Nin duwen aht kin wia se pahn kehsehkihong kumwail ansou me koasondi pahn kin wiewihda.

Ni ahi kin medewe tehnpas sarawi kan, I kin tamanda kapai kan me kolang nan tehnpas sarawi kan. Ni atail kin pidelong nan wenihmw en tehnpas sarawi kan, kitail kin pwilikihdi kedirepw kan oh sawehwe kan en sampah. Nan wasa sarawi wet, kitail kin diar me lingan oh koasondi mwahu. Mie popohl ong kitail oh komoal sang kedirepw en atail mour kan.

Ni atail pahn kin kohla nan tehnpas sarawi, kitail pahn alehdi wiepen kakehlail en palingehn ieu oh popohl me pahn siksang pepehm koaros me kin kohdo nan mohngiong en aramas. Kitail pahn esehla ia wehwehn mahsen en Soundoro ansou me e ketin mahsanah: "I kihong kumwail popohl, pein ei popohl me I kihong kumwail. . . . Kumwail dehr nsensuwed, oh pahtou, oh masak."¹

Soangen popohl wet kak audehda mongiong en aramas koaros—mohngiong kan me nsenduwed, pahtou, salongala, pekipeki sawas.

Me keren I esehda me emen mwahnakapw me kohla nan tehnpas sarawi pekpeki sawas nan ah mohngiong. Sounpwung kei mwowe e alehdi malipilip en wia ah misin

nan South America. Ahpw, nah visa pwahnd en wiawihda kahrehda ah misino kosoudo nan ehu mission nan United States. Mendahte ah nsensuedkihla ah sohte kak kohla wasa me tepin koasondio, e koasonehdi me e pahn doadoahk laud oh wia ah kak koaros wasa kapw me irail kihengo. Ahpw e nsensuwedkihla pwehki mie misineri nan misin me e pepehm me re sohte nohn nsenohki kalohki rongamwahu ihte irail en wie pereperen.

Mwurin sounpwong kei daulih mwahnakapw menet ahneki kahpwal en soumwahu ehu me kahreda ah mwoatorala, ih eri kapwurpwurala nimwehu pwehki soumwahuo.

Mwurin sounpwung kei mwahnakapw menet mwahula douluhl, oh soumwahu en mwoatoro sohrasang. E alehdi rohng me e pahn pwurehng papah nan misin, kapai me e wie kapakapki rahn koaros. Ihte kansensuwedpe pwehki ah pahn pwurehng pwurala nan misin me e kohsango, wasa me e kehn en ekei misinerih kan arail wiewia sohte nohn pahreking dahme irail udahn pahn wia.

E kohdo nan tehnpas sarawio pwe en rapahki popohl oh pasapeng en kak ahneki papah mwahu nan misin. Ah pahpa oh nohno pil iang kapakapki me arail kohla nan tehnpas sarawio pahn sewese anahn en neira pwutako.

Ni en pwutak pwulopwul menet ah pidolong nan perehn celestial mwurin tiepene en kapai, e mwohndi pohn ehu sehr oh tepda kapakapki kaweid sang Sahn Nanleng.

Emen pil pidelong nan perehn celestial mwurinte mwahnakapwo ede Landon. Ni eh aluhlong nan perehn celestial, e mwadangete kilangada mwahnakapwo mwomwohd pohn sehro, mesehkan meirpene wie kapakap. Landon alehdi pepehm ehu me

e anahne koasoeng mwahnakapwo. Pwehki e kahng kawehla ah kapakapo a e awih. Mwurin minit kei daulih ah mwahnakapwo wie kapakapte. Landon ese me e sohlahr kak awih ah pahn tuhkieng pepehm. E kohla limwahn mwahnakapwo oh doahke pohn pwopwehu. Mwahnakapwo pehdpeseng, pwuriamweiki ah kedirepwehu. Landon ndahieng ni ngihl tikitik, "I pehm me I anahne koasoiwei, ihte I sehse dahme kahrehda."

Ni ara tepda koasoi, mwahnakapwo kasalehda ah pepehm koaros ong Landon, kawehwehiong soang koaros oh imwikihla ah men alehdi popohl oh kakehlail duwen ah misino. Landon, me apwtehn pwurasang nan misin soupar ehu mwowe, koasoiahieng duwen ah misino, kahpwal akan me lelohng, oh ah kin peki sawas rehn Kauno, oh kapai kan me e alehdier. A lokaiah kau udahn kameleilei oh kakehlail, oh e sewesehda mwahnakapwo. Mwurin mwo en mwahnakapwo peikasal sohrala oh e audaudkihda popohl. E ahneki kaping laud ni ah kehnda me ah kapakap pasapenglahr.

Mwahnakapw riemeno kapakapene, oh Landon kaunopada pahn mwesel, peren pwehki ah idawehn pepehm me e alehdio. Ansou me e pahn mweselehr, mwahnakapwo idek rehn Landon, "Iawasa me ke wia ahmw misin?" Lel ansou, ira sohte koasoi pene eden wasa me ira wia ara misin kau. Ansou me Landon sapengki eden ah misino, pilen mesen mwahnakapwo dirida nan mesehu. Landon papah nan mission me mwahnakapwo pahn pwuralahng!

Nan kisin likou ehu me Landon ehukihongie en mwahnakapwo koasoi mwohn ah kohkohsang: "I pwoson me Sahn Nanleng pahn kapaie, ahpw I sohte medewehieng

me E pahn kadaredo emen sang nan ahi misin. I ese me soang koaros pahn mwahu."² Kauno karongehier oh sapengalahr kapakap en aramas mohngiong karakarahk.

Riei ohl oh lih akan, nan atail mour kitail ahneki kasongosong; kitail udahn pahn kin lelohng kahpwal akan. Ni atail pahn kin kohla nan tehnpas sarawi, tamataman atail inou kan me kitail wiadahr wasahu, kitail pahn kak mengei en powehdi kasongosong kan oh kahpwal akan. Nan tehnpas sarawi kitail kak diar popohl.

Kapai en nan tehnpas sarawi sohte kak pweipweida. Ehu kapaio me I kin kapingki rahn koaros nan ahi mour iei me ngehi oh ahi pwoud, Frances, alehdier ni aht kelepwikihdi ni pei sarawio oh wiadahr inou tengeteng me pahn kolkhiptene nan mour soutuk. Sohte kapai I kesempwalkhsang ahi ese me ehu rahn ih oh ngehi pahn pwurehng tuhene.

I kapakapki me Sahn Nanleng pahn kapaia kitail pwe kitail en kak esehda udahn kesempwalpen kohla kaudok nan tehnpas sarawi, pwe kitail en kak peikiong Sapwellime kosonned akan, oh kitail en kak idawehn atail Kauno oh Soundor, Sises Krai. I kadehde me Ih me atail Sounkomour. Ih iei lehros en Koht. Ih me tepin iasada tepin rahn en Easter, kahreda mour soutuk kak kohieng Sapwellimen Koht seri kan. Ni atail pahn kawauih rahn kesempwal wet, kitail wia atail kapakap en kaping pwehki Sapwellime kiskas kaselel wet ong kitail. I kapakapki pwe mpwukat en kak pweida ni Sapwellime lengileng sarawio, amen.

IREN SAWAS AKAN

1. Sohn 14:27.

2. Thomas S. Monson kolokol audepen soaio.

Padahk Kan ong Atail Ansou

Sang Mei 2014 lel Oaktowpw 2014, padahk kan en Priesthood oh Pwihn en Sawas en Lih ni kapahieu en Rahn Sarawi kan konehng en kaunopda sang padahk ehu de tohtohsang ehu me kohda nan tiepene lap en Epreil 2015. Nan Oaktowpe, padahk kan kak en pilipilda sang tiepene lap en Epreil 2015 de Oaktowpe 2015. President kan en stake oh district konehng pilada mehnia padahk me pahn doadoahk nan arail wasa kan, de re kak kepwukoahki pwukoah wet pisop kan oh president en prans kan.

Padahk pwukat mie ni lokaia tohto ni conference.lds.org.



Sang President Dieter F. Uchtdorf

Sounsawas Keriau nan Presidensi Keieu

Kisakis en Kalahngan

Rahnwet oh ansou koaros kalahngan en Koht kin mie ong koaros me ahneki mongiong en koluhla oh ngehn peik.

Ni Rahn Sarawi en Ihster kitail kin kasarawi irair kesempwपाल ieu me aramas kin kasik sangete keilahn aio.

Ih rahn o me wekidala mehkoaros. Rahno, ahi mour wekila.

Amwail mour wekila.

Mour en Sapwellimen Koht serihkan koaros wekila.

Ni rahn kesempwपाल, Sounkomourpen tohn sampah, me pein pwukoakihdi dih p oh mehla me kolkolkitaildi, ahpw powehdi oh kamaiauitailda.

Pwehki tounmetei en atail Soun doar kempoake, mehla sohte pahn poweikitaildi,¹ Manaman en Seh dan pahn tokedi, oh kitail pahn “mour kapw . . . oh direkihla koapworopwor pwehki *kaiasada* en Sises Krai.”²

Mehlel, Wahnpoaron Pohl pwung ni eh koasoia me “kumwail kanse namwahwihkinkumwailla mahsen pwoatet.”³

Sapwellimen Koht Kalahngan

Kitail kalap koasoia Sapwellimen Sounkomouro Tohmw—oh ih me konehng!

Seikop mahsanih, “Kitail soh koasoia tohmw en Krai, oh ahpw wehwehkihla Ih ni unsek?”⁴ Ahpw

ni atail “koasoia Krai. . . . pereniki Krai, . . . kalohki Krai, oh kokohpki Krai” ahnsou koaros me kitail kak,⁵ kitail en pwuriamweikihte oh kapingkalahngan ki tounmetei poatopoa en Sapwellimen Koht Iehros.

Sapwellimen Sounkomouro Tomw o sohte kak wiahla mehkot mwahl nan atail padahk, atail koasoia de loaletail. E wia mehkot sarawi, pwe sang ni “kaimwiseklahn tomw lapalap” wet Sises Krai ketin “komourala aramas koaros me pahn pwoson mware.”⁶

I kin pwuriamweikihta me Sapwellimen Koht Iehroso ketidhdo pwehn doareikitailla, ni atail sohte unsek, sohte mwakelekel, kalap sapwungala oh sohte kalahngan. Nan ai mada madau soh itar I nantieng en wehwehki Sapwellimen Sounkomouro Tomw, oh ihte me I kak medewe, me Sapwellimen Koht limpoak ong kitail, me laud, unsek oh poatoapoa. Oh I sohte kak kasawihda “ia wen lauden limpoak en Krai, duwen eh tehlap, eh reirei, eh ile oh loal.”⁷

Ehu kilelpen limpoak o kin die rekda nan pwuhk sarawi me kadahniki *Sapwellimen Koht kalahngan*—iei sapwellimen Koht sawas oh kisakis en kakehlailih kitail pwehn

powehdi atail luwet akan oh soh itar kan oh ahpw wiahla aramas lapalap me direki “mehlel oh marain, lau [kitail] lingankihla me mehlel oh [ese] mehkoaros.”⁸

Kalahngan en Koht me inenen kapwuriamwei. Ahpw aramas kalap sohte wehwehki.⁹ Ahpw kitail anahnete ese duwen Sapwellimen Koht kalahngan ma kitail kasik en iang sohsohki dahme kaunopadahng kitail nan Sapwellime wehi poatoapoa.

Pwehki mwo, I men koasoia duwen kalahngan. Keieu, duwen ia mwomwen kalahngan *kin ritingada ewen kehl en nanleng* oh keriau, ia mwomwen *e kin ritingada wenihmw tok en nanleng*.

Keieu: Kalahngan kin Ritingada Ewen kehl en Nanlehg

Pwehki kitail koaros “wiadahr dih p, oh sohte kak koanoahdi ligan en Koht,”¹⁰ oh pwehki “sohte mehkot samin kak pedelong nan wehin Koht,”¹¹ kitail koaros sohte warohng pwuriala mwohn silangin Koht.

Mendahte kitail papah ki ong Koht ngenatail unsek, e sohte itar; pwe kitail pahn wiahte “ladu sohte katepe.”¹² Kitail sohte kak pwain kitail longala nanleng; pwuhng en Koht me pahn kauhkitaildi, pwe sohte atail manaman en pein powehdi.

Miehte atail koapworopwor.

Sapwellimen Koht kalahngan me iei atail koapworopwor poatopoa.

Sang ni tohnmetei en Sises Krai, koasoandien mahk kin apwalihala pwung en tenek¹³ “oh ketkihdo mehk kan rehn aramas akan pwe irail en ahneki pwoson ong ni koluhla.”¹⁴

Mendahte kitail weitahtahkilahr dipatail kan, ahpw kitail kak mwakelelella duwehte sinoh.¹⁵ Pwehki atail Sounkomouro “ketkihda kahlepe

pwehn tomwiki dipen koaros,”¹⁶ E ketkihdo elen pedelongo nan Sapwellime wehi poatopoot.¹⁷

Ewen kehlo ritadahr!

Ahpw kalahngan en Koht sohte kin kasapahldohng kitail mour mwakelekel te. Ma komourala wehwehkihte irihrsang atail sapwung kan oh dipatail kan, eri e sohte pahn kapwaiada kupwuren Sahmo ong kitail. Dahme e ketin kupwurki me laud mehleh: E ketin kupwurki Sapwellime pwutak oh serepein kan en duwehla Ih.

Pwehki kisakis sang Sapwlimen Kauno kalahngan, alen tohn papah en Sihses sohte kahluwai kitail en pwurala mwuri ahpw e kaweid kitail en uhdahla nanleng.

E kin kahreikitaillahng soahngkan me kitail sohte kak wehwehki! E pahn kahrehiong kitail en lapalapala nan wein seletial en Samatail me ketiket Nahleng, wasa me irail akan me kitail kin poakohng mih ie, oh kitail alehdi “sapwellime lingan unsek oh popohl.”¹⁸ Kitail pahn ahneki soahng koaros, oh kitail me Sapwellimen Krai.¹⁹ Mehleh mehkoaros me Sahn o sapwellimanki pahn kohieng kitail.²⁰

Pwehn sohsohki lingan wet, ritingadahte ewen kehlo sohte itar; kitail anahne weidlongala nan ewen kehl wet oh ahniki ineng en wekidala—soahngen wekidek mehleh me pwuhk sarawi kin kawehwehki, “ipw sapahl, iei ipwieng rehn Koht, wekidek sang mour en sampah, kolahng mour pwung, komourla rehn Koht, wiahla sapwellime pwutak oh serepein kan.”²¹

Keriau: Kalahngan kin Ritingada Wenihmwtok en Nahleng

Pilehu palien Sapwellimen Koht kalahngan me iei wenihmwtok en nahleng, me Koht kin kamwarediong kitail kapai kan en manaman oh kehl, me pahn sowesei kitail en pweida nan soahng kei me uhdahno pahn nohn apwal ong kitail. Sang ni Sapwellimen Koht kalahngan me Sapwellime serikan kak powehdi kasongosong kan en me mwersuwedo, powehdi diparail kan, oh ahpw “kaunsekla rehn Krai.”²²

Mendahte mie atail luwet, kitail kak powehdi. Mehleh sang ni kalahngan en Koht, ma kitail pahn karakarakhkala oh pwoson, me kin kaluwetihkitail kak uhd wiahla mehn kakehlailih kitail.²³

Erein atail mour kan, kalahngan en Koht kin ketkihdo kapahi kan ni paliwar oh kisakis kan ni palingen me kin kalaudehla atail koahiek oh kamwahwiala atail mour. Sapwellime kalahngan kin kamwahukitaila. Sapwellime kalahngan kin sewese kitail en wiahla wen mwahu me kitail kak.

Ihs me Kak Warohng?

Nan Pwuhk Sarawi kitail wadek duwen sapwellimen Krai ketla ni mwen Saimon mehn Parisi.

Mas liki, Saimon mesen ohl mwahu oh inen. E kin kalap kapwaiada eh pwukoa kan nan pelien eh lamalam: e kin peikiong kosonned kan, pwain eh meirong, wauneki rahn en Sapat, kapakap rahn koaros oh kin kohla ni ihmwen kaudok.

Ahpw ni en Sises ketket rehn Saimon, lih emen ahpw patohdo, widen alueluwen Sounkomouroki pilen mese, oh keiehki Alueluweh kan kin leh pwohmwahu.

Saimon sohte pwungki soahngen kaudok wet, pwe e eseier me lih menet kin mour suwed. Saimon medemedewe me Sises sohte mwahngi, eri kaidehn soukohp men Ih de E sohte douluhl pahn mweidong liho en doahke ih.

Ni E ketin mwahngi eh madamadau, Sises ahpw ketin keinemwe rehn Saimon mahsanih. “Aramas riemen mie ara pweipwand ong ohl emen. Emen rehra pweipwandki tala limepwiki, a emen tala limeisek.

“Ira koaros sohte ara mehn kapwungala ara pweipwand ko, iei me ohlo mahkikihong ira koaros. Eri, menlau sapeng ie, ihs rehra me eh limpoak laud ong ohlo?”

Saimon ahpw sapeng patohwan me e lemeleme me aramas me ale mahk laud rehn ohlo.

Sises eri padahki ehu lepin padahk kesempwal, mahsanih: “Komw mahsanih lih menet? . . . Dipe kan me tohto

me lapwadahr; *pwe e kin limpoak laud*: a me dipe sohte nohn lapwada, nahn eh kin limpoak tikitik.”²⁴

Nanpwungen aramas riemenet ihs me kitail duwehte?

Kitail duwehte Saimon? Kitail kin nan kapehd kehlail oh nsenamwahuki atail wiewia mwahu kan, koapworopworki pein atail mour pwung? Kitail soh kin sohte kanengamahiong irail akan me sohte kin wia dahme kitail kin wia? Kitail kin wiewiahte dahme kitail ahnlahr wia, ieiang atail mihting kan, sangsangahtki class en Padahk en Rongamwahu, oh wie te-tehk neitail cell phone kan ahnsouhn mihting en kamadipw sarawi?

De kitail duwehte lihmenet, me wiahki me e salongala douluhl pwehki dipe?

Kitail ahneki *limpoak laud*?

Kitail kin wewehki atail pweipwand ong Samatail Nahleng oh peki ni ngidingid sapwellimen Koht kalahngan?

Ni ahnsou me kitail kin kapakap, kitail kin kapwurehiongete atail kapikapinga duwen atail mour pwung, de kitail kin wehkada atail sapwung kan, pekpeki mahk sang rehn Koht, oh sengisengki atail kapingki pilahn en komouro?²⁵

Aramas en komourla sohte kak en pweipweikihda peik; Sapwellimen Koht Iehros me ketin pwainiki nta.²⁶ Medemedewe me kitail kak komourala pwehki atail wiewia mwahu kan duwehte atail pahn pwainda ticket en seiloak oh ahpw medemedewe me kitail waranikilahr soumpihir kan. De medemedewe me mwurin omw pwain rent en ihmw, ke uhd sapwankihla sampah pwon.

Eri Menda Peik?

Ma kalahngan wia kisakis ehu sang rehn Koht, dahme peikiong kosonned en Koht kesempwalki? Menda kedirepwki Sapwellimen Koht kosonned kan—de koluhla? Kitail soh wehkadahte me kitail aramas dipan oh mweidong Koht en doareikitailla?

De doadoahngki en Pohl peideko, “Kitail en dadaurete dihp, pwe

kalahngan en Koht en laudla?” En Pohl pasapeng iei: “Soh kowahlap!”²⁷

Riei ko, kitail kin peikiong kosonned en Koht akan—pwehki atail poakohng Ih!

Nannantieng en wehwehki Sapwellimen Koht kisakis en kalahngan ni mohngiong unsek oh nan kapehd unsek pahn kalaudehla kahrepen atail poakohng oh peikiong Samatail Nahleng ni opampap oh kaping. Ni atail kin wewid ni elen tounpadahk en Krai, e kin kamwakelekitailla, kamwahwikitailla, oh seweseikitaill en duwehla Ih, oh e pahn kapwurekitailla mwohn silangi. Wen “Ngehn en Kauno [atail Koht]” kin kawiliakpwkitailla mehleh, . . . kitail solahr pahn inangih wia me suwed, ahpw kitail pahn men wia me mwahu ahnsou koaros.”²⁸

Eri, atail peikiong Sapwellimen Koht kosonned kan kin pwilisang atail limpoak oh kapingkihong kupwurmwahu en Koht. Soahngen limpoak mehleh oh kaping wet pahn kihpene atail wiewia kan oh kalahngan en Koht. Mour mwakelekel pahn kamwakele atail madamadau kan sohte tokedi, oh atail soh peikal en uh mwohn sihlengin Koht pahn kehlailla.²⁹

Maing riei ko, loaloapwoat en momourki rongamwahu sohte apwal. E wia kaiahn kaperen ehu—en kaunopadahng sohsohki lingan kowahlap en mour poatopoa. Kitail kin ngoangki peikiong Samatail Nahleng pwehki ngenatail kan pahn tepida ahnla soahng kan me pid palingen. Kitail pahn tepida wehwehki soang kan me kitail sehse duwen mwoweo. Kamarain oh wehwe pahn kodohng kitail ni ahnsou me kitail kin kapwaiada kupwur en Sahmo.³⁰

Kalahngan wia kisakis ehu sang rehn Koht, oh ni atail kin inangih peikiong Sapwellimen Koht kosonned akan koaros kitail kin kasalehiong Samatail Nahleng me kitail inangih ale sapwellime kisakis sarawi wet.

Mehkoaros Me Kitail Kak Wia

Soukohp Nephi sewese kitail en

wehwehki Sapwellimen Koht kalahngan ni ahnsou me e mahsanih: “Kitail kin doadoahk laud . . . pwehn kakehlaka neitail serikan, oh pil riatail kan, en kamehlele Krai, oh kopwungpwungala rehn Koht; pwe kitail ese me *sang ni kalahngan me kitail pahn doarekihla, mwurin mehkoaros me kitail kak wia.*”³¹

Ahpw, I men ese ma ekei pak kitail kin sawehwehki lepin lokaia kan, “mwurin mehkoaros me kitail kak wie.” Kitail anahne wehwehki me lepin lokaia “mwuri” sohte duwehte lepin lokaia “pwehki.”

Kitail sohte doarehla “pwehki” mehkoaros me kitail kak wie. Mie nanpwungatail me wiaher soang *koaros* me kitail kak wia? Koht kin awi lau sohla douluhl atail kehl mwohn E kin ketin sowesekin kitail sapwellime kalahngan?

Aramas tohto kin nan kapehd tikititinkihla arail sohte kapwaiada arail pwukoa. Re pein ese me “ngehn me peik, oh uduk me luwet.”³² Re kin iang Nephi ngil laudida ndinda, “Ngeniet pahtoukilahr ei wiewia suwed kan.”³³

Uhdahn I kamehlele me Nephi esier me kalahngan en atail Sounkomour o kin *kahreiong* oh *sowesehda* kitail en powehdi dihp.³⁴ Ihme karehda Nephi koangoahnghehkiong nah serikan oh rie ko en “kamehlele Krai oh kopwungpwungla rehn Koht.”³⁵

Eri, *ihme* kitail *is* kak wia! Oh *ihme* atail doadoahk nan mour wet!

Kalahngan mweimweiong kitail Koaros.

Ni ahnsou me I kin medemedewe dahme Sounkomouro wia ong kitail mwohnte keieun Ihster o, I men ngillaudida oh ngisingiski ai kapinga Koht Wasa Lapalahpie oh Sapwellime Iehros, Sises Krai!

Ewen kehl en nahleng ritidahr!

Wenihmwotok en nahleng kan ritpesengehr!

Rahn wet oh kohkohahte Sapwellimen Koht kalahngan kak kohieng aramas koaros me karakarahl oh aktitikit ni palingen.³⁶ Sises Krai kaunopada ahl ong kitail en ksepwilda ni uwe ieu me aramas sohte

kak wehwehki.³⁷

I kapakapki me kitail pahn marainkihla oh kapingkalahnganki uwen kesempwalpen tounmetei en atail Sounkomouro. I kapakapki me kitail pahn kasalehda atail limpoak ong Koht oh atail kaping pwehki kisakis en Sapwellimen Koht kalahngan sang ni atail pahn kapwaiada Sapwellime kosonned akan oh pereniki “wewidki ni mour kahpw,”³⁸ Ni mware sarawi en atail Kaun Lapalap oh Soundoar, Sises Krai, amen.

IREN SAWAS AKAN

1. Tehk 1 Korint 15:55; Mosiah 16:8.
2. 1 Peter 1:3; ire kapatapat iang.
3. 1 Deselonika 4:18; pil tehk ire 13–17.
4. Jacob 4:12.
5. 2 Nephi 25:26.
6. Alma 34:10, 15.
7. Episos 3:18–19.
8. Tehk Doctrine and Covenants 93:28.
9. Mehleh me kitail “kisin seri kei, oh . . . saikinte wehwehki ia wen laud en kapai kan me Sahmo sapwellimaniki ni lime ko oh me e ketin kaunopadahng kitail ehr” (Doctrine and Covenants 78:17).
10. Romans 3:23.
11. 1 Nephi 15:34; pil tehk 1 Nephi 10:21; Moses 6:57.
12. Mosiah 2:21.
13. Tehk Alma 42:15.
14. Alma 34:15.
15. Tehk Aiseia 1:18.
16. 1 Timoty 2:6.
17. Tehk 2 Peter 1:11.
18. Tehk Doctrine and Covenants 50:24.
19. Tehk Doctrine and Covenants 88:63.
20. Tehk Doctrine and Covenants 84:20.
21. Mosiah 27:14.
22. Moroni 10:5.
23. Tehk Ether 12:27.
24. Tehk Luhk 7:36–50; ire kapatapat iang.
25. Sapwellimen Krai karasaras duwen Parisi oh sounrik daksis kin kasalehda met (tehk Luhk 18:9–14).
26. Tehk Wiewia Kan 20:38.
27. Romans 6:1–2.
28. Mosiah 5:2.
29. Tehk Doctrine and Covenants 121:43.
30. (Tehk Sohn 7:17.)
31. 2 Nephi 25:23; ire kapatapat iang.
32. Madiu 26:41; pil tehk Rom 7:19.
33. 2 Nephi 4:17.
34. Tehk 2 Nephi 4:19–35; Alma 34:31.
35. 2 Nephi 25:23.
36. Tehk 3 Nephi 9:19–20.
37. Tehk 1 Korint 2:14.
38. Rom 6:4.

© 2015 sang Intellectual Reserve, Inc. Kolokol pwuhng koaros. Ntingda nan USA. Kamaman ong lokaiahn wai: 6/14. Kamanaman ong kawehwe: 6/14. Kawehwehpen *Visiting Teaching Message*, May 2015. Pohnpeian. 12585 885